

‘Main-Main’ kupas isu serius dalam masyarakat

► **NUR SYAMIMI AWALLUDIN**
nsyamimi@sph.com.sg

PENDERAAN seksual dan keluarga, serta penyalahgunaan dadah – itulah antara isu yang dikupas dalam pementasan *Main-Main* sempena *Pentas Budaya* tahun ini.

Pentas Budaya antara acara teras Persatuan Bahasa Melayu Universiti Nasional Singapura (PBMUKS).

Acara tahunan itu dianjurkan oleh Setia Seni PBMUKS. *Pentas Budaya* pun sudah mencecah 10 tahun.

Setiap tahun, *Pentas Budaya* diadakan dengan tujuan mempertingkatkan pengetahuan masyarakat Melayu tentang isu-isu relevan dan ketara masa kini.

Pementasan *Main-Main* diadakan pada 12 dan 13 Mei lalu di Drama Centre Blackbox, Perpustakaan Negara.

Persembahan itu dipadankan daripada skrip tulisan Aidli ‘Alin’ Mosbit dan pernah dipentaskan di *Pesta Raya* Esplanade pada 2002.

Pentas Budaya kali ini membongkar beberapa nilai serta maklumat yang wujud dalam kalangan mereka yang dipinggir masyarakat Singapura.

Main-Main mendalami kehidupan dan kecenderungan enam wataknya memahami pendirian, dorongan dan sumber kebahagiaan.

Watak-watak karya itu terdiri daripada seorang anak gadis yang dirogol bapa sendiri; penagih dadah; isteri terniaya; suami teraniaya; wanita simpanan; dan lelaki yang suka berfoya-foya.

Ketika dihubungi, Encik Nurhelmy Hakim Irwan, 22 tahun, selaku penyelaras projek *Pentas Budaya*, berkata:

“Melalui pementasan hampir dua jam ini, kami berharap penonton dapat melihat isu larangan yang dianggap tabu dengan pandangan berbeza, dan merenungkan persoalan yang diketengahkan.”

Tahun ini, ahli jawatankuasa *Pentas Budaya* terdiri daripada 25 mahasiswa Universiti Nasional Singapura (NUS).



Barisan pelakon merangkumi siswa NUS dan individu bukan dari NUS.

Bakat pelakon dicungkil melalui uji bakat Januari lalu.

Tambahan pula, sambutan yang diterima *Pentas Budaya* kali ini amat memberangsangkan. Kesemua tiket untuk tiga pementasan *Main-Main* PBMUKS laris dijual.

Terkini, menurut laman Esplanade, pada Khamis hingga Ahad, 20 hingga 23 Julai ini, *Main-Main* akan dipentaskan sekali lagi sempena *Pesta Raya*.

Pementasan sejam 40 minit di Studio Teater Esplanade itu akan diarah sendiri Aidli ‘Alin’ Mosbit dan dijayakan Al-Matin Yattim, Farez Najid, Farhana M. Noor, Hatta Said, Munah Bagharib and Suhaili Safari.

PENTAS BUDAYA 2017: Ahli jawatankuasa ‘Pentas Budaya 2017’ terdiri daripada 25 siswa NUS, sementara pelakornya seramai enam orang (*barisan depan*). – Foto ALIFAH SAMSUDIN